

Ebbaluṅa eyi Pawulo gaṅandiihira Abefeeso Enyanjula

Pawulo nj'owaṅandihira *Abefeeso* ebbaluṅa yino mu mwaha ogw'enkaaga oluvanyuma lw'ohusaaliwa hwa Kurisito. Abahugu mu by'Ebbayibbuli baloma baati wayire mu bbaluṅa yino, mubulamo obuheese hy'obuli mu Bakolosaayi, Pawulo nj'owayinandiha. Hamunga ebbaluṅa yino yali yahugenda mu bibbubbu by'abafugiirira Kurisito mu twale eryo. Pawulo aloma ati gaali mu komera aṅa ṅandiihira ebbaluṅa yino (3:1; 4:1; 6:20). Pawulo gaṅandiha Tukikasi n'ebbaluṅa yino owaali hu lugendo ohuhyalira abafugiirira Kurisito mu hibuga Efeeso (6:21-22).

Efeeso hyali hibuga ehibbala mu twale ly'Asiya mu buṅugi w'Abarooma. Era ehibuga Efeeso hyali himanyihene olwa yekaalu y'Arutemi hatonda w'Abayonaani (Bik 19:23-31). Mu hutandiha, abafugiirira Kurisito b'Efeeso baali b'amaani aye oluvanyuma banafuṅa mu hufugiirira hwawe (Hweh 2:1-7).

Mu hitundu ehidaayi ehy'ebbaluṅa yino, Pawulo anyonyola ng'olu Hatonda gatobola abaatu babe era gahena gabanonola ohuṅwa mu bibi byawe era ehyo gahihola n'abita mu Yesu Kurisito. Ageragerania abafugiirira Kurisito ohuba hy'omubiri nga Kurisito

nj'omutwe, era nohu nyumba nga Kurisito nj'ebaale ery'omusonda. Mu hitundu ehyohubiri, Pawulo ahubbirisa abafugiirira Kurisito ohuba n'obulamu obusaanira omuutu atya Hatonda.

Ebiri mu bbaluŋa yino mu buupi

1. Pawulo geyanjula era aheesa Abefeeso (1:1-2)
2. Ekolagana ŋagati wa Kurisito n'abafugiirira babe (1:3-3:21)
3. Obulamu w'abafugiirira Kurisito (4:1-6:20)
4. Engohoba (6:21-24)

Enyanjula

¹ Ndiise Pawulo omuhwenda wa Yesu Kurisito olw'ohusiima hwa Hatonda. Pandiihira enywe abagwalaafu, abesiga Yesu Kurisito abali mu hibuga Efeeso.* ² Hatonda Seefe ni Musengwa Yesu Kurisito babanambire ehisasabirisi era babane emiyaaya.

Ekabi ohubita mu Kurisito

³ Hujumirya Hatonda Semwana wa Musengwa weefe Yesu Kurisito owabitira mu Kurisito ohutuŋa hiisi kabi ejomwigulu. ⁴ Hatonda n'ahiiri hutonda ehyalo gaatutobola, n'abita mu Kurisito, hube bagwalaafu ni huŋumaho hamogo mu moni jije. Olw'ohutwenda, ⁵ gasalaŋo ohuŋwa ahale nahale ohutufuula baana babe n'abita mu Yesu Kurisito olw'ohusiima huhwe, ⁶ c'ehigira huli n'ohumujumirya olw'ehisasabirisi hihye ehi

* **1:1** 1:1 Ebyanandihiwa ebindi sibiroma biiti "mu hibuga Efeeso."

gatuᅇa n'abita mu Mwana wuwe oyo omuhoda. ⁷ Kurisito ni gafa, amafugi gage gatununula ng'atusonija ebibi. Ehisabirisi hya Hatonda ⁸ ehi gatuyomboolera hyatuᅇa amagesi ohufaaniana etegeha yiye. ⁹ Era gatuhwehulira ehyaama ehi gaali n'ategehire ohwoheresa n'abita mu Kurisito. ¹⁰ Etegeha yiye yiri yiiti ehiseera ni hyolire, aleete ᅇalala ebiitu byosibyosi ebiri mwigulu nohu hyalo, ᅇaasi w'obunugi wa Kurisito.

¹¹ Olwa Kurisito, Hatonda gatutobola gaahena gatwabula ohuba abaatu babe ng'olu genda era ahola byosibyosi ni geema hu tegeha yiye yira eya halehale, ¹² ko efe Abayudaaya abehereeye ohuba n'esubi mu Kurisito, humujumirye era humuᅇe eᅇono. ¹³ Era enywe Abatali Bayudaaya mwesi Hatonda gabafuula abaatu babe ni mwanjulira amazima, nj'Amanjuliro Amalanji aganjamba hu hunojoha. Ni muhenire ohufugirira Kurisito, gaabaᅇa Omwoyo Omutukuvu oyu gabasuubisa ohuᅇwa ahale nahale ohulaga ati muli babe.

¹⁴ Omwoyo oyo nj'ahabonero ahahahasa haati Hatonda alituᅇa ebi gasuubisa abaatu babe era ti aja hutununula, leha humujumirye olw'eᅇono lirye.

Ohweyaasa n'ohusaba hwa Pawulo

¹⁵ Olw'ehyo, ohuᅇwa olu n'anjulira ti mufugirira Yesu Musengwa era mwenda abagwaalafu bosibosi, ¹⁶ sindeherangaho ohweyaasa Hatonda hu lwenywe mu husaba hwange. ¹⁷ Mbasabira ti Hatonda wa Musengwa weefe Yesu Kurisito

era Seefe owenono, abanje Omwoyo Omutukuvu ko mwahaba n'amagesi mumutegeere bulani. ¹⁸ Era saba ti emoni jenywe ejomu hida jirimbuhe mufaanie ebiitu eby'amaani ebi Hatonda gabalangira era mulindirire ni njanuma hubu-usabuusa ebi gasuubisa abaatu babe. ¹⁹ Saba ti mutegeere amaani gage amabitiirifu ohuhira gosigosi era agatuyeeda efe abafugiirira.

²⁰ Amaani ameene ago, nj'agalamusa Kurisito ng'ahena geehala mu hifo ehy'enono hu lubega lw'omuhono omulungi ogwa Hatonda mwigulu.

²¹ Kurisito oyo ali namugulu w'obunangi n'abanugi era anuga abanamaani n'abahombe bosibosi, sinahani hyonene aye emirembe n'emirembe. ²² Hatonda gaata ebiitu byosibyosi njaasi w'obunangi wa Kurisito, ng'amufuula Musengwa† era anuga hiisi hiitu olw'abo abamufugiirira. ²³ Abafugiirira abo, nj'omubiri gwa Kurisito era nj'aleetera hiisi hiitu ohuba n'obulamu.

2

Hwafuuha balamu hulwa Kurisito

¹ Ni mwali ni muhiiri hufugiirira Yesu, mwali bafu mu mwoyo olw'ebibi byenywe.

² Mwalondereranga esambo embi ej'ehyalo hino, ni mudembuhira Sitaani, omwoyo ogunuga na mugulu mu bbanga. Hatyane, omwoyo jana ogwo nj'ogunuga abo abajeemera Hatonda.

³ Ohwegomba ohw'omubiri n'epeega yeefe embi ni bitunuga ng'olu byali ni binuga

† 1:22 1:22 Oba "omutwe."

abaatu abandi. Era olw'ebibi ebyo, hwesihwesi Hatonda gaali atuliho ehiruji. ⁴ Aye Hatonda olw'ohutwenda obugali n'olwehisa hihye ehibitirifu, ⁵ gatulamuhisa ŋalala ni Kurisito ohuŋwa mu bujeemu omu hwali ni hufiiriye, gatunoŋola olw'ehisasabirisi hihye. ⁶ Hatonda gatulamuhisa ŋalala ni Yesu Kurisito era ng'atwihasa ni naye mwigulu olwohuba huli hirala ni naye. ⁷ Gaahola ehyo ohulaga abomu mirembe ejiribaŋo obulaŋi n'ehisasabirisi hihye ehibitirifu ehi gatuŋambira mu Yesu Kurisito. ⁸ Mwanonoŋoha olw'ehisasabirisi hihye olu mwamufugiirira, olwohuba ohunoŋoha simaani genywe aye hirabo hya Hatonda. ⁹ Hatonda sigabanoŋola olw'ebikolwa byenywe ebiraŋi olw'ehyo ŋaŋume owepaahapaaha. ¹⁰ Hatonda gatutonda n'abita mu Yesu Kurisito ohuholanga ebiraŋi ebi gatutegehera.

Obulala mu Kurisito

¹¹ Olw'ehyo, enywe Abatali Bayudaaya era "abatali bahomole" ng'olu Abayudaaya babalanga olwohuba mbo nibo bahomole, (ohuhomola ohu baatu bahomola n'engalo)* muhebulire ehi mwali mu biseera ebyahale. ¹² Mwali muŋuma Kurisito era simwali baatu ba Hatonda, ni batababalira hu gwanga ery'Abayisirayiri, abaatu ba Hatonda era ni muŋuma mugabo mu ndagaano ejirimo ebi Hatonda gasuubisa. Mwali muŋuma suubi lyosiryosi era ni muŋuma Hatonda omwene buŋangi. ¹³ Aye ŋaahani ohubita

* **2:11** 2:11 Mag 10:16. Ŋaliŋo ohuhomola ohundi ohw'omwoyo.

mu hufa hwa Yesu Kurisito, enywe abaali ni mwedanyiriiye analeeni, Hatonda gabeegeresa huupi olw'amafugi ga Kurisito. ¹⁴ Kurisito galeeta emiyaaya, gaagira Abayudaaya n'Abatali Bayudaaya hwaba muutu mulala, gatusaŋo obulabe owaali hy'ehiteepe ni butwabuuju. ¹⁵ Olu gafa hu musalabba, gadibya ebiragi-ro n'amagambi g'Ehiyudaaya ko afaananie Abayudaaya n'Abatali Bayudaaya ohuba egwanga erala era enyaaha mu moni ja Hatonda, mu kola eyo galeetaŋo emiyaaya. ¹⁶ Ohufa huhwe hu musalabba hwatufaanania ni Hatonda hwatusaŋo obulabe ŋagati w'Abayudaaya n'Abatali Bayudaaya, hwesihwesi hwagobola ŋalala. ¹⁷ Kurisito gaaja gabalamera enywe Abatali Bayudaaya abaali analeeni ni Hatonda n'Abayudaaya abaali ohuupi ni naye, Amanjulo-ro Amalanji.*

¹⁸ Ŋaahani hwesihwesi hubita mu Kurisito oyo ko hwola eyiri Hatonda Seefe olw'amaani g'Omwoyo wuwe. ¹⁹ Olw'ehyo, enywe Abatali Bayudaaya simuhiiri balugendwa aye muli b'ehiha hirala n'abaatu ba Hatonda era abomu nyumba yiye. ²⁰ Enywe muli nyumba eyi baatongola hu musingi gw'esomesa y'abahwenda n'abanaabbi, Yesu Kurisito omwene n'ali nj'ebaale eryomu sonda era ery'omugaso. ²¹ Kurisito nj'anambiriiye enyumba eyo yosiyosi era nj'agira yagalama yaba Yekaalu enjabufu eya Musengwa. ²² Mu Kurisito, enywe mwesi Abatali Bayudaaya,

* **2:17** 2:17 Yis 57:19

babatongolera njalala ni neefe Abayudaaya ohuba enyumba omu Mwoyo wa Hatonda amenya.

3

Pawulo abuulira mu Batali Bayudaaya

¹ Ese Pawulo, bambona hu lwenywe Abatali Bayudaaya olwohuba pereesa Yesu Kurisito.

² Mbalomera ti ng'olu mwanjulira, Hatonda gaapambira ehisasabirisi gaapa omulimo ogw'ohulomera Abatali Bayudaaya Amanjuliro Amalanji.

³ Ko huloma gakwehulira ehyama hihye ng'olu pandiihire mu buupi. ⁴ Mu husoma ebbaluja yino, muja hufaanina ng'olu Kurisito nj'ehyama ehyo.

⁵ Hatonda sigahwehulira abomu mirembe ej'ahale ehyama ehyo, ng'olu hiri njahani n'abita mu Omwoyo Omutukuvu eyiri abahwenda n'abanaabbi babe abagaabula ohumuñeeresesa. ⁶ Ehyama hiri hiiti, Amanjuliro Amalanji gagira Abatali Bayudaaya basuna omugabo njalala n'Abayudaaya hu hisuubizo hya Hatonda ohubanojola. Era bosibosi mubiri mulala ohubita mu Yesu Kurisito.

⁷ Olw'ehisasabirisi hya Hatonda, gaapa ekabi ohuba omuñeeresesa ohulomera abaatu Amanjuliro Amalanji gano olw'amaani gage.

⁸ Wayire ndiise ow'edaala erya njasi mu abaatu ba Hatonda bosibosi, aye gaapa ekabi ohulomera Abatali Bayudaaya Amanjuliro Amalanji aganjamba hu bunjinda obubitiirifu obuli mu Kurisito. ⁹ Era Hatonda oyo owatonda hiisi hiitu, gaatuma ohulomera abaatu bosibosi

ebinjamba hu hyama ehyo ehi gaali n'ahwehire ohunjwa ahale nahale. ¹⁰ Ehigendererwa hihye hiri hiiti njahani n'abita mu abafugiirira Kurisito, balomere emisambwa n'abanamaani abali mu bbanga ebijamba hu magesi gage amangi agatanjwayo. ¹¹ Ohunonjola abaatu, nj'eyaali etegeha ya Hatonda ko atonde ehyalo era gayoheresa n'abita mu Musengwa weefe Yesu Kurisito. ¹² Njahani ni hubita mu Kurisito oyo olw'ohumufugiirira, hwigerera eyiri Hatonda n'obugumu. ¹³ Olw'ehyo, mbegayirira mutanjwamo maani olw'ohungudya ohubangudya hu lwenywe, olwohuba hyasuno eyi muli.

Ohumanya ohwenda hwa Kurisito

¹⁴ C'ehigira kubhira Hatonda seefe amafuha ni mbasabira, ¹⁵ Hatonda oyo nj'owatonda ebiitu byosibyosi mwigulu nohu hyalo. ¹⁶ Saba ti Hatonda ow'enjono ery'amaani, abanj amaani gage n'abita mu Mwoyo wuwe. ¹⁷ Era saba ti mufaanie ng'olu Hatonda abenda bugali weene era Kurisito amenye mu mwoyo jenywe olw'ohumufugiirira ko musigale ni muli bagumu, ¹⁸ ko enywe njalala n'abagwalaafu abandi bosibosi, mutanje ohufaania ohwenda hwa Kurisito ng'olu huli hw'amaani. ¹⁹ Era mumanye ohwenda hwa Kurisito ohwo eyiri abaatu, ohwenda ohu omuutu atanjanga hufaania mu magesi gage ag'obuutu ko mube n'obulamu obu Hatonda genda.

²⁰ Njahani Hatonda oyo ali n'obujangi ohuhola n'ohuhiraho ebi humusunga n'ebi

hujeege, olw'amaani gage agaholera mu efe.
²¹ Abamufugiirira banjenga Hatonda enono ohu-
 bita mu Yesu Kurisito emirembe n'emirembe.
 Amiina.

4

Huli mubiri mulala mu Kurisito

¹ Ng'omuutu oyu baabona olw'ohujeeeresa
 Musengwa, mbegayirira mube n'esambo
 ejoolana n'obulamu obu Hatonda gaabalanga
 ohuba ni nawo. ² Mube abaatu abatetulirisa,
 mwenjomehe era hiisi muutu gehalirihenga
 owahye olw'ohwendana. ³ Mufubengaho
 ohweyongerera ohuloma hiralala, Omwoyo wa
 Hatonda n'ali nj'abayeeda ohumenya njalala mu
 miyaaya. ⁴ Huli mubiri mulala, n'Omwoyo
 wa Hatonda mulala ng'olu hihusuubira
 ohusuna, hiri hiralala. ⁵ Njalinjo Musengwa
 mulala n'obuhwenda bulala obu hufugiirira
 ko n'ohubatiziwa hulala ng'ahabonero ahalaga
 haati huli hiralala ni Kurisito, ⁶ Hatonda,
 Semwana w'abaatu bosibosi mulala anuga
 ebiitu byosibyosi, aholera era amenya mu hiisi
 muutu wuwe amufugiirira.

⁷ Kurisito gaja hiisi muutu ehirabo
 ehy'enjabulo ng'olu omwene asiima. ⁸ C'ehigira
 ehyanandiihiwa hiroma hiiti,
 "Ganjangula abasigu
 era ni gatiina mu hifo ehya namugulu obugali
 gaana abaatu ehirabo."*

* 4:8 4:8 Zab 68:18

⁹ Hitegeesa hi ohuloma oti gatiina mu hifo ehya njamugulu obugali? Hitegeesa hiiti geheerera ohwiha njaasi hu hyalo. ¹⁰ Oyo oweeha, nj'omwene oyo owatiina mwigulu na mugulu obugali ohuhiraho ebireri ko amaamire hiisi hitu. ¹¹ Era nj'omwene oyo owanja abaatu ebirabo. Abandi gaabana ohuba abahwenda babe, abandi ohuba abanaabbi, abandi ohuba abalomera abaatu Amanuliro Amalaji, abandi ohuba abaayi ko n'ohusomesa abaatu ba Hatonda. ¹² Ehyo Kurisito gahihola ni genda batendehe abaatu babe mu mulimo gw'ohumuñeeresesa ko omubiri gugwe guhule, ¹³ ohwola hwesihwesi olu huliba hy'omuutu mulala mu hwesiga n'ohumanya Omwana wa Hatonda, hunangale mu by'omwoyo hube hya niye. ¹⁴ Anjo sihunaahabe hy'abaana abanjere abacuuhacuusa ana naana olw'esomesa ey'obudulingi era egodamya abaatu. ¹⁵ Aye hube b'amazima era hwendane ko huhule mu hiisi ngeri hya Kurisito omutwe gwefe abamufugiirira. ¹⁶ Kurisito oyo aleetera omubiri gwosigwosi ohwenjimba njalala, hiisi muutu n'ahola omulimo gugwe ko omubiri gwosigwosi gwahula olw'ohwendana.

Obulamu obunyaaha mu Kurisito

¹⁷ Mutege ohutwi mbalomere hino olw'obunangi wa Musengwa, era leha mbanje hu magesi ti mulehere anjo ohwebisya hy'abaatu abali n'epeega embi abatafugiirira Hatonda. ¹⁸ Obulamu waawe wijuuye ehiirema era banuma mugabo ogw'obulamu obutanwanjo olw'obunanyi n'obuhahanyafu w'emyoyo jaawe.

19 Baṅuma n'esonni era baṅwera mu huhola eby'obuṅemu. Bali n'omulungo ohuhola ebibi ebya hiisi ngeri aṅaṅuma hwemoota.

20 Aye enywe sibabasomesa baatyō hu Kurisito. 21 Mu butuufu, mwanjulira obuhwenda ow'amazima obuṅamba hu Yesu. 22 Ng'olu babasomesa, mwefihule obulamu obuhale owijuuye ohwegomba ohw'obudulingi obu mwalimo ni muhiiri hufugiirira Yesu. 23 Mwambale obulamu obunyaaha ohuṅwa ewa Hatonda, mufuuhe banyaaha nomu biṅeego byenywe, 24 era mube baatu abanyaaha aba gatonda mu hifaananyi hihye ohubeera erala abagwalaafu era abamusangaasa.

25 Olw'ehyo, mulehe obudulingi, hiisi muutu alomenga amazima olwohuba huli mubiri mulala. 26 Nṅanabaṅo ehibaluṅja, mwehuumenga ohutabaleetera huhola hibi. Mutagwisanga eryuba ni muhiirunṅire,* 27 era mutanṅanga Sitaani ebbanga ohubahema ohuhola ehibi. 28 Omwibi alehere aṅo ohwiba aye abeho n'ehyahola aṅange ohuyeedaho abo abagadi. 29 Mweṅalame endoma embi aye ebibono byenywe bibe ebiyeeda abo ababinjulira. 30 Era mutenṅunamisanga Omwoyo wa Hatonda olwohuba nj'ahabonero ahalaga haati balibanunula hu ludaalo olw'ekomero. 31 Mweṅalenga ohuba abaatu abehabyo n'oluswa. Mutanṅayirisanga oba ohuṅalatana n'omuutu yesiyesi. 32 Aye hiisi muutu alumirwenga era asoniṅenga owahye ng'olu

* 4:26 4:26 Zab 4:4

Hatonda gabasoniŋa n'abita mu Kurisito.

5

Ohuba mu njase

¹ Ŋaahani ng'olu muli abaana ba Hatonda abahoda, leha abe ehy'ohuboneraho mu bulamu wenywe, ² era mwendanenga ng'olu Kurisito gatwenda geenayo gaafa hu lwefe ohuba enongo erisangaasa Hatonda.

³ Mutaholanga obuhwedi oba omuutu yesiyesi ohuba n'emoni enyangu oba ayayaanira ebibi by'ehyalo hino. Ebiitu hy'ebyo, sihiranji ohuba mu abaatu ba Hatonda. ⁴ Mutalomanga eby'obunemu wayire ohumooa ohwehisirusiru aye mweyaasenga hweyaasa Hatonda. ⁵ Hino muhimanyire erala muuti ŋaŋuma muhwedi wayire oyo ahola eby'obunemu oba eby'obudakaani oba aŋemberesa hu ebibi by'ehyalo hino, ko nj'ohujumirya ebitali Hatonda, alisuna omugabo mu bunugi wa Hatonda ni Kurisito. ⁶ Omuutu yesiyesi saabadulinganga ati Hatonda afugiirira ebiitu hy'ebyo, olwohuba aligudya abajeemu, n'ehirunji. ⁷ Olw'ehyo, mutaholanga muhumba n'abaatu hy'abo.

⁸ Ni muhiiri hufugiirira Kurisito, mwagenderanga mu hiirema aye ŋaahani ng'olu muli n'omuhumba ni Musengwa, mugenderanga mu njase olwohuba muli baatu b'enjase. ⁹ Hiri hiityo olwohuba enjase nj'egira omuutu gaahola ebiranji, ebirunamu era eby'amazima. ¹⁰ Era

mugesyengaho ohuhola ebisangaasa Musengwa. ¹¹ Mutaholanga ebiitu eby'ehiirema olwohuba binjuma ehi biyeeda aye mubyanihenga hubyaniha. ¹² Hinjamba n'elsoni ohuloma hu ebyo ebi bajeemu bahola mu ngiso. ¹³ Aye enjase enahubba mu hiirema, ebiitu byosibyosi ebyomu hiirema biboneherera, ¹⁴ olwohuba enjase nj'egira hiisi hiitu hyaboneha. C'ehigira baloma baati,

“Sisimuha ewe oli hy'ofuluuta,
era ewe oli hy'omufu lamuha onjwe mu bafu,
era onahola otyo, Kurisito aja hu huhwaduhisa
enjase.”

¹⁵ Mwegenderesenga, mutebisyanga hyabanubeebe aye hy'abali n'amagesi. ¹⁶ Mutambisenga hiisi kabi eyi muba ni nayo bulaji ohuhola ebiraji olwohuba omulembe guno mubi. ¹⁷ Olw'ehyo, mutaba hy'abatategeera aye mufaanie ehi Musengwa genda. ¹⁸ Era mutameeranga olwohuba ehyo hija hu bonoona aye mulehe Omwoyo Omutukuvu abamaamirenga. ¹⁹ N'omwoyo mulala, mwemberenga Musengwa e Zabbuli n'enyembo ej'ohumujumirya, n'eki Mwoyo abanja ohuseega. ²⁰ Era habuhyabuhya mweyaasenga Hatonda Seefe olw'ebiitu byosibyosi, ebi Musengwa weefe Yesu Kurisito gaatuholera.

Abasinde n'abahasi baawe

²¹ Hiisi muutu anjulirenga owahye olw'ohuna Kurisito enono. ²² Abahasi, munjulirenga abawamwenywe ng'olu munjulira Musengwa, ²³ olwohuba omusinde nj'omutwe

gw'omuhasi wuwe ng'olu Kurisito ali nj'omutwe gw'abamufugiirira, omwene n'ali nj'Omunoŋosi waawe. ²⁴ Ng'olu abafugiirira bagondera Kurisito, n'abahasi boosi banulirenga abawamwawe mu hiisi hiitu.

²⁵ Abasinde, mwendenga abahasi benywe ng'olu Kurisito gendire abamufugiirira era geenayo gafa hu lwawe, ²⁶ gabagwalaasa n'abooga n'amaaji, nj'ehibono hihye, ²⁷ ko abamufugiirira abo, babe bagwalaafu eyi ali ni banumaho hamogo wayire mbalo oba efunyi. ²⁸ Mu ngeri nj'enyene, n'abasinde mwesi mwendenga abahasi benywe ng'olu mweyenda mwabeene. Owenda omuhasi wuwe aba geyenda. ²⁹ Nanuma kadi mulala owerya olubeŋe aye geeriisa era geerabirira ng'olu Kurisito alabirira abamufugiirira, ³⁰ olwohuba huli mubiri gugwe. ³¹ Hyanjandiihiwa hiiti, "Olw'ehyo, omusinde analehenga semwana ni nyina, genimba n'omuhasi wuwe nga bombi bafuuha mubiri mulala."* ³² Hino hyama hihulu era hiraga ng'olu Kurisito n'abamufugiirira bali omuutu mulala. ³³ Ale, hiisi musinde gendenga omuhasi wuwe ng'olu geyenda omwene era n'omuhasi yeesi anjenga wamwe enono.

6

Abasaaye n'abaana baawe

¹ Abaana, mudembuhirenga abasaaye benywe hulwa Musengwa, olwohuba ehyo hirani. ² "Onjanga lataawo ni maawo,

* **5:31** 5:31 Tand 2:24

eṅono,” lino nj’egambi edaayi eriri n’ehisuubiso ehiroma hiiti, ³ “Ko ebiitu bihutiinire bulani era owangaale hu hyalo.”
⁴ Abasaaye mutanyigisanga baana benywe aye mubasomesenga ebi Musengwa genda.

Abeedu n’abasengwa baawe

⁵ Abeedu, mudembuhirenga abasengwa benywe era mubanenga eṅono n’omwoyo mulala ng’olu mwahadembuhiye Kurisito.
⁶ Ehyo mutahiholanga olwohuba babataayeho emoni aye muhiholenga ni muhenereeye ng’abeedu ba Kurisito olwohuba ehyo nj’ehi Hatonda abendaho. ⁷ Mujeeresenga abasengwa benywe n’omwoyo omulala hy’abanjeeresa Musengwa omwene sosi abaatu,
⁸ olwohuba muhimanyire muuti Musengwa aja hunja hiisi muutu omuhemba, haabe mwidu oba bbe, ni geema hu hiisi hiraṅi ehi ahola.

⁹ Ni nenywe abali n’abeedu, mubabisyenga bulani ni ṅaṅuma hubahayula hiisi aṅa naṅa. Muhebulire muuti Musengwa yenywe mwes-imwesi ali mwigulu era ṅaṅuma oyu aboola.

Ebisooa eby’abafugiirira Kurisito

¹⁰ Ehisembayo, mube badimamu hu lw’amaani ga Musengwa. ¹¹ Mwambale ebisooa byosibyosi ebi Hatonda abana ko muṅange ohunjinjania ekwe ja Sitaani. ¹² Sihunjinjana n’abaatu bahyefe abali n’omubiri n’amafugi aye n’abanugi, n’abanamaani, n’amaani g’ehiirema agali mu hyalo muno ko n’obunugi w’emisambwa ejinugira mu bbanga. ¹³ Olw’ehyo, mwambale ebisooa

bya Hatonda ko muṅange ohuṅirirania ekwe ja Sitaani n'abawagaaye. ¹⁴ Njaahani mwemeerere ni mwesidihire amazima mu hihunya ng'olu muutu geeboṅa omusipi, n'ebikolwa ebirani bibe hy'ehyohwambala ehi musirikale gambala mu hifuba ohwehummisa mu lutalo. ¹⁵ Mwambale engayito ohulaga ohwetegeha ohulomera abaatu Amanjuliro Amalanji engeri eyi bananga ohusunamo emiyaaya ja Hatonda.* ¹⁶ Ohumeeda hu ebyo byosibyosi, mube n'ohufugiirira hy'engabo ko muṅange ohwehuuma obusaale wa Sitaani obuli hy'omuliro owalasa. ¹⁷ Mwambale obunoṅosi hy'ekofira eyi omusirikale gambala era muṅambe ehibono hya Hatonda ehi Omwoyo abanja hibe hy'epiima ohusoosa omusigu.* ¹⁸ Mu lutalo luno, Omwoyo abatangirirenga mu husaba ohwa buli hiha habuhyabuhyu. Era mube butebute, mutaleheranga husabira abaatu ba Hatonda bosibosi.

¹⁹ Keesi musabirenga, Hatonda gaape ehy'ohuloma era ndomere abaatu n'obugumu, ehyama ehiri mu Amanjuliro Amalanji. ²⁰ Ndi mu komera olw'ohulomera abaatu Amanjuliro Amalanji. Musabireho mbe n'obugumu mbuulire ng'olu hyahali.

Obuheese

²¹ Mulebe yeefe omuhoda oyu balanga baati Tukikasi era omuṅeeresa omwesigwa owa Musengwa, aja hu balomera hiisi ebiifaho n'ebi kola. ²² C'ehigira ndihumutuma eyo olw'esonga

* **6:15** 6:15 Yis 52:7 * **6:17** 6:17 Yis 59:17

enyene eyo ko mumanye ng'olu huli era abago-bosemo n'amaani.

²³ Hatonda seefe ni Musengwa Yesu Kurisito, babaje emiyaaya n'ohwenda era babayeede ohuba n'ohufugiirira. ²⁴ Hatonda abanjambire ehisasabirisi, enywe mwesimwesi abenda Musengwa weefe Yesu Kurisito n'omwoyo mulala.

Endagaano Epyaha mu Lunyole
Nyole: Endagaano Epyaha mu Lunyole (Bible)

copyright © 2019 Wycliffe Bible Translators, Inc.

Language: (Nyole)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 21 Feb 2024 from source
files dated 29 Jan 2022

e00787cd-838f-597a-9477-00b97e4e2cff